

Leterenji Poli à tun Filemɔ á ke

Mpe yii à yaa yii cè mà jwo yii jyè leterenji funɔ jwumpe e ke

Jwumpe Nintanmpe pu nɔye na Yesu kyaa yu ke, Poli à puru jwo Filemɔ á, ka u u dá pu na. Filemɔ na mpyi shinbwo, bilinaŋi wà na mpyi u á, uru mege na mpyi Onezimu. Ka uru bilinaŋi si mpa fê.

Lir'à pi ta pi à Poli cù a tò kàsuni i Kile Jwumpe njwuŋi kurugo. Nɔye ka Onezimu si fê a sà uye ta Poli yyére kàsuni i. Nɔye lir'à pyi ke, ka Poli si wá na Yesu kyaa yu Onezimu á fo u à pa dá Yesu na. Lire kàntugo ka u u Poli tège Yesu kani njwuŋi na sùpyire sannt'á. U kyaa mpyi a táan Poli á sèe sèl'e fo Poli mpyi maha u pyi uru jyaŋi mà tàanni ná Kile kuni i. Nɔye tènì là à pa nɔ, ka Poli si li lwó uye funŋi na uru sí Onezimu nùruŋo n-tùugo Filemɔ á.

Lire tènì i, biliŋi n'a mpyi a fê, ka pi i nùr'a u ta a cù, u jùŋufoonji mpyi maha u kyéree, lire nɔye me maha u bò. Lire e Poli à nge leterenji séme a kan Filemɔ á, maa yi jwo u á na Onezimu ká nùr'a nɔ u na, u áha u cù biliwe fiige me, nka u u cù u cìmpworo fiige mà tàanna ná Kile kuni i. Poli zòŋi mpyi na n̄kùre mpe jwumpe tajwuge e Filemɔ á Onezimu kyaa na me, naha kurugo ye u mpyi a tēen ná l'e na ur'à jwo a kùuŋo cyage n̄kemu na ke, na Filemɔ sí li pyi n-tòro kuru cyage taan. Puru mpe jwumpe cye kurugo, Poli mpyi a yi fēen a cyán Filemɔ taan na u Onezimu cye yaha bilere na.

Poli à Filemɔ shéere

1 ¹Mii Poli u nɔye kàsuni i Yesu *Kirisita kurugo ke, mii ná wuu cìmpworoŋi Timɔti u à nge leterenji tun mu Filemɔ á, wuu cevoonji ná wuu báarapyiŋeeŋi, ² ná mu Afya á wuu cìmpworocwoŋi ná mu Arisipi u à wuu tège zhìleni na Kile jwumpe yyaha yyére zhèŋi kurugo ke, ná dánafeebii pi maha piye bínnini mu Filemɔ bage e ke. ³Wuu Tunji Kile ná wuu Kafoonji Yesu Kirisita pi jwɔ yii na, pi i yyeniŋke kan yii á.

Poli à lógo na dánafeebii kyal'à táan Filemɔ á

⁴ Filemɔ, tère o tère e mii à Kile jáare ke, mii maha u shéere mu kurugo, ⁵ naha na ye mii à lógo na Kile shiinbii kyal'à táan mu á, ali nume mu à maye tíiŋe Kafoonji Yesu na. ⁶ Lire kurugo mii na Kile jáare mu á, Kile kuni l'à wuu pyi wuu à wwò ke, bà kuru wwoŋeege si mpyi s'a sè yyaha

na me, yaayi niŋcenŋyi wuu à ta *Kirisita á ke, kuru wwoŋeɛge ku ma pyi mà yire cè a ɲwɔ. ⁷Pyiŋkanni na Kile wuubii kyal'à táan mu á ke, lir'à mii funŋke táan maa màban le mii i sèl'e. Mii cìmpworonji, lire mpyiŋi cye kurugo, mu à Kile wuubii zòmɲyaagii waha.

Poli à Filemɔ ɲáare bilinaŋi Onezimu kyaa na

⁸Lire kurugo mii sí kyaa niŋkin cya mu á. Mà tàanna ná wuu wwoŋeɛge e *Kirisita na, mii mpyi na sí n-jà fànha cyán mu na mu u li pyi. ⁹Ŋka Kile wuubii ntàannamagare ti ɲye mu i ke, tire kurugo mii sí mu ɲáare ma a li pyi. Funŋɔ cwo li na na mii Poli yyecwugo wuŋi pi à cù a tò kàsuni i Yesu Kirisita kurugo ke, mii u na mu ɲáare. ¹⁰Onezimu kurugo mii na mu ɲáare, ɲaha na ye u à pyi nume mii pyà Yesu Kirisita wwoŋeɛge e naha kàsuni i. ¹¹Tèni l'e, u kaɲwɔɔ mpyi mu á me. Ŋka nume, u kaɲwɔɔn'à ta mii ná mu á. ¹²Ali mà li ta u kyal'à waha mii na bà mii yabiliŋi kan'à waha naye na me, mii sí u núruŋɔ n-tùugo mu á. ¹³Mà mii yaha naha kàsuni i Jwumpe Nintanmpe ɲjwuŋi kurugo, li mpyi na sí n-táan mii i mà u yaha naye taan, u raa karii pyi mii á mu cyaga. ¹⁴Ŋka mii à li sòŋŋ'a ta na mii ɲye a yaa mii u kyaa pyi mu kàntugo ná mii ɲye a li jwo mu á, ka mu u li ɔɔn shwɔ mà ye. Mii la ɲye sè mu kárama mu u kacenne pyi mii á me, fo ndemu ká fwordo mu i ke.

¹⁵Li sí n-jà n-ta Onezimu à láha mu na tère nimbilere e, si núru ŋkwɔ mpyi ná mu i fo tèekwombaa. ¹⁶U saha sè n-pyi mu biliwe kanna me, u sí n-pwɔɔ biliwe na, u sí n-pyi mu cìmpwororo. U kyal'à táan mii á sèl'e, ŋka u kyal'à yaa li taan mu á mà tòro mii na, ɲaha na ye u ɲye mu wu, maa mpyi Kafoonji Yesu wu mú. ¹⁷Ŋye kampyi mii à sè mu cìmpwororo mà tàanna ná Kile kuni i, mii n'a mpyi a shà mu yyére, mu mpyi na sí mii cù ɲwɔ cùŋkanni ndemu na ke, mii na li caa mu á, Onezimu ká nɔ mu na, ma a u cù a ɲwɔ amuni. ¹⁸U aha nta u à kakyara pyi mu á, lire ɲye me mu fwoo ká nta u na, mii sí cyire puni tò. ¹⁹Mii Poli yabiliŋi cyege k'à mpe jwumpe puni séme na mii sí mu fwɔhigii puni tò, mii sè na wuuni jáara mu na me, lir'à li cyèe na mii fwoo ɲye mu na, ɲaha na ye mii à mu le Kile kuni i.

²⁰Mii cìmpworonji, mii la ɲye ma a lire kacenni niŋkinŋi pyi na á Kafoonji Yesu kurugo, ma a màban le mii i *Kirisita wwoŋeɛge e. ²¹Mii à li cè na nde mii à cya mu á ke, na mu sí lire pyi mii á. Lire kurugo mii à ŋge letereŋi tùugo mu á. Mii mú à tèen ná l'e na mii à jwo a kùuŋɔ cyage ŋkemu na ke, mu sí li pyi n-tòro kuru cyage taan.

²²Ŋye ta na bashonge bégeli, mii à tèen ná l'e, Kile sí yii ɲareyi shwɔ pi i mii cye yaha mii i sà fwordo mu na.

Fwùŋi nizanŋi

²³Epafirasi u naha naha ná mii i kàsunŋi i Yesu *Kirisita mege kurugo ke, u à mu shéere. ²⁴Mii báarapyiŋɛebii Marika ná Asitariki ná Demasi ná Luka à mu shéere mú.

²⁵Kafoonŋi Yesu Kirisita u ɲwɔ yii na, u u jwó le yii á.